

光緒山西通志

鄉賢錄十四 錄二之十四 山西通志第二百二十九

賜進士出身頭品頂戴兵部侍郎兼都察院右副都御史巡撫山西提督軍務臣張煦奉  
旨監修

明 成化至正德

張縉字朝用陽曲人成化己丑進士授鈞州知州補滄州遷  
南京工部郎中出爲杭州府知府節縮浮費省民錢十餘萬  
遷山東參政都御史劉大夏治河張秋委令調度河左右悉  
被其利築南望東隄令運卒得於水漲時分道並挽晉秩通  
政司右通政尋擢右僉都御史巡撫眞保二府轉右副都御  
史巡撫宣大有保障績改督漕運值歲荒奏留米十萬石  
振饑民入爲戶部左侍郎晉南京戶部尙書以不附逆瑾致  
仕旋與尙書韓文同下詔獄又以前奏請改兌爲擅更祖制

除名瑾誅起補都御史督漕如故兼剿淮南盜奏捷賜璽書  
褒勞已而力請致仕得旨晉南京戶部尙書歲給夫米如故  
縉起州郡游歷臺省在滄州將去任民攀臥泣留後經其地  
民歡呼迎馬首者絡繹不絕後因家焉卒年八十三著有玉  
雪遺稿及奏議若干卷

陳琦字文玉清源人成化辛卯舉人初判華州斷理明決時  
北兵入寇西夏撫臣以琦有文武材略選西鳳等府民兵千  
人屬之遂截殺韋州拒戰紅德城擐甲胄者七日奮不顧身  
追獲強掠人畜萬計升知安化縣再補邯鄲皆有德政云  
陳璧字端卿陽曲人成化壬辰進士知嘉興武邑二縣以強  
項著擢監察御史出按山東辨太保劉翊獄轉山東副使備  
兵臨清漕運奸弊叢生璧至裁省殆盡還本省按察使有倚

法爲奸者立治之遷南京太僕寺卿清操嶢然建棲雲瓊山  
二樓攜佳客詠詠竟日有康樂香山遺風三年擢右副都御  
史整飭薊州邊務兼撫順永三府未幾以病告歸璧性抗直  
居家孝友重行訖爲御史時偶觸兄怒長跪謝過爲副使時  
與僉事某舊有隙比卒傾囊槩博之後膺節鉞遣賦遂初急  
流勇退其風節尤足尙云

杜蔡陽曲人成化庚子舉人授城固知縣升南京戶部主事  
時逆瑾勢傾中外凡晉秩者率厚遺謁謝蔡獨不行僅數月  
卽奪其官瑾誅起擢員外卽言行政事多可爲後人法以年  
老乞歸

唐希介字景賢陽曲人成化丁未進士選庶吉士改工科給  
事中命稽省眞定等四鎮儲備盡得宿弊以聞權倖見嫉請

四川石砭宣撫司經歷稍遷漢陰令繕修城郭庶務畢興遷知南通州靖漁鹽盜修河隄民用安堵擢陝西按察司僉事督餉榆林時大學士楊一清總制邊務議增茶市以贖軍賦希介條答便宜二十三事一清并施行之且貽書以謝改四川僉事尋擢陝西按察司副使愛養士卒約束裨校邊境肅然軍府多贏積中官欲私取希介不可中官搆諸逆瑾瑾矯詔令休致歸年八十五卒

王瓊字德華太原人成化二十年進士授工部主事進郎中出治漕河三年著爲志繼者按之不爽毫髮由是以敏練稱改戶部歷河南右布政使正德元年擢右副都御史治鹽兩淮入爲戶部右侍郎轉吏部改南京振恤畿甸山東地方轉戶部右侍郎八年進尙書瓊爲人有心計爲郎時悉錄故贖

條例盡得其斂散盈縮狀及爲尙書益明習國計邊帥請務  
模則屈指計某倉某場痔糧草幾何諸郡歲輸邊卒歲採秋  
青幾何曰足矣重索妄也人益以瓊爲才時用兵將士率以  
首功進秩瓊言此羸秦弊政行之邊方猶可未有內地而論  
首功者惟以蕩平爲功不計首級從之瓊在中樞天下士馬  
多寡強弱及關塞夷險偏裨才否一覽輒記有所條答悉中  
機宜請於河間設總兵官一人大名武定各設兵備副使一  
人責以平賦而檄順天保定兩巡撫嚴兵要害爲外防集遼  
東延緩士馬於行在以護巡幸車駕制置周詳中外恃以無  
恐巡按請討孝豐賊湯麻九瓊曰此小賊數人縛之足矣請  
密敕都御史許廷光出不意果盡擒之四方捷奏以蔭資加  
少師兼太子太師子錦衣世襲千戶又蔭錦衣千戶者二玉

帶蟒服珍饌金帛之賜不可勝紀十四年甯王宸濠反上下  
詔親征命瓊與楊廷和等居守先是瓊用王守仁撫南贛假  
便宜提督軍務至是舉朝惴惴瓊治兵自如大言曰諸君勿  
憂吾用王伯安贛州正爲今日不過旦夕賊成擒耳果如其  
言尋代陸完爲吏部尙書瓊用守仁平宸濠功最大然與錢  
甯江彬等結請許軍官從兄弟再從子襲軍職殊濫又廢天  
下清軍御史世宗入繼言官交劾瓊繫都察院獄遣戍莊浪  
改綬德霍韜首薦瓊嘉靖六年令還籍桂萼復言瓊前力攻  
廷和故廷臣羣起排之今邊陲急人而廷臣才力實出瓊下  
乃命復尙書明年遂以兵部尙書兼右都御史代王憲督陝  
西三邊軍務土魯番將牙木蘭沙州番帖木哥土巴得求內  
附詔瓊趨肅州議之賊獻還哈密求通貢乞歸羈留使臣瓊

奏乞撫納兵部尙書王時中議從之瓊復上番寇肅州狀并言賊方悔過宜俯納其請再疏力請詔還番使通貢如故自是西域復定而北寇犯莊浪瓊部諸將遮擊之斬數十級寇退入紅城子明年寇甯夏犯靈州瓊督遊擊梁震等邀斬七十餘人秋集諸道精卒三萬按行塞下自甯夏抵花馬池旌旗三百餘里不絕寇聞之徙帳遠遁諸軍分道出縱野燒耀兵而還會給事邱九仞劉世揚御史吳仲等劾瓊令致仕俄寢前詔遣使慰諭之時番大掠臨洮瓊集兵曉以禍福諸番多順命惟若籠板爾諸族不服乃討焚其巢斬首二百六十撫降七十餘族錄功加太子太保瓊在邊戎備甚飭寇嘗入山西得利踰崱復獵境上陽欲東瓊令備其西寇果入大敗之寇益懼而土魯番率十國奉貢及是諸番蕩平西陲益靖



甘肅軍民恐瓊一旦去寇患復生相率乞守臣奏留巡撫唐澤巡按胡明善具陳其功優詔獎之時吏部尙書久不補十年冬決用瓊遣行人齎敕召之南京御史馬敷等十人力詆瓊盡逮下獄瓊至卽以爲吏部尙書請罷上慰諭之未幾花馬池有警兵部尙書王憲請發兵瓊言花馬池備嚴寇必不能入大軍至且先退徒耗中國憲竟發六千人比至彰德寇果遁十一年秋卒官贈太師謚恭襄瓊在本兵時功多而其督三邊也人以比楊一清云

郭曦字景陽榆次人成化丙午舉人授新蔡知縣歲祿貯粟萬餘石振活甚眾時流賊屠掠郡縣率民兵禦之城賴以安秩滿民保留仍任一年加升承直郎開州同知尋擢河南通判丁艱歸

李杲洪洞人成化乙酉舉人幼聰敏博洽羣書任臨洮府同知殫心體國政多惠愛頌聲載途既去民建祠祀之初管蘭州倉場民歌之曰官攢無鼠偷監收得李侯收支不留難軍民兩下安草場失火民懼杲得罪爭償納之其得人心如此韓文字貫道洪洞人宋宰相琦後也成化初舉進士除工科給事中覈韋州軍功劾甯晉伯劉聚都御史王越馬文升等濫殺妄報尋劾越薦李秉王竑語頗涉兩官被撻已晉右給事中出爲湖廣右參議太和山中官乾沒公費力邊之以其羨易粟萬石備振貸九谿土司與鄰境相攻往諭皆服閱七年轉左宏治初王恕用爲山東左參政居二年用倪岳薦擢雲南左布政使以右副都御史巡撫湖廣移撫河南召爲戶部右侍郎母喪除起吏部晉左十六年拜南京兵部尙書歲

祿請預發軍餉三月戶部難之文曰救荒如救焚有罪吾自當之乃發廩十六萬石米價爲平召拜戶部尙書文凝厚雍粹至臨大事剛斷無所撓武宗初諸費需銀百八十萬兩有奇請先發承運庫不許文言帑藏虛賞資自京邊軍士外請分別給銀鈔稍益以內庫及內府錢并暫借助戚賜莊田稅而勅承運庫內官核所積金銀著之籍且盡罷諸不急費不從文持大體務爲國惜財請沒真人陳應禎大國師那卜堅參等資實國帑監局倉庫內官宥濫力請裁汰瀆安公主奪任邱民業力爭乃止先是孝宗時外戚慶雲壽甯侯請買補殘鹽至百八十萬引文條鹽政夙弊七事論殘鹽尤切孝宗嘉納武宗登極詔中罷之侯家復奏文再三執奏不從正德元年又言鹽法之設專以備邊今山陝歲饑寇方大入度支

遺納飛輓甚難奈何襄祖宗法忽邊防之重而景清復陳乞如故文劾其傑悍請執付法官始寢前命榮王乞霸州莊田崇王請自徵莊田租皆特御之保定巡撫王環請革皇莊覆如其議不許又請召民佃畝徵銀三分輸內庫而盡撤中官管莊者稍從之中旨索寶石西珠請屏絕奇珍報可大婚索銀四十萬兩疏請得免四之一權倖深疾之時青宮舊奄馬永成等八人號八虎日導誘狗馬鷹兔歌舞角觝文每退朝對僚屬言及輒泣下郎中李夢陽請率大臣固爭文捋鬚昂肩毅然改容曰善縱事無濟吾年足死矣不死不足報國令夢陽草疏讀而刪之遂偕諸大臣伏闕略言近歲朝政日非號令失當自入秋來視朝漸晚仰窺聖容日漸清削皆言太監馬永成谷大用張永羅祥魏彬邱聚劉瑾高鳳等造作巧

偽淫蕩上心擊毬走馬放鷹逐犬俳優雜劇錯陳於前至尊  
萬乘與萬人交易狎暱嫖蕩無復禮體日遊不足夜以繼之  
勞耗精神虧損志德遂使天道失序地氣靡甯雷異星變桃  
李秋華考厥占候咸非吉徵竊觀前古奄宦誤國爲禍尤烈  
今永成等罪惡旣著若縱不治將來益無忌憚必患在社稷  
伏望明正典刑以回天地之變削禍亂之階明日召請大臣  
入司禮監李榮謂文曰此舉出自公公云何文曰今海內民  
窮盜起水旱頻仍天變日增文等備員卿佐靡所匡救上始  
踐阼輒輕萬幾遊宴無度狎暱羣小何忍無言是夜召堯入  
司禮永成等分據要地瑾恨文甚日令人伺文過踰月以偽  
銀輸內庫爲文罪降一級致仕給事中徐昂疏救責其黨護  
落文職并除昂名尋指文爲奸黨榜朝堂子高唐知州士

刑部主事士奇皆削籍文出都門乘一籃輿行李一車而已  
瑾恨猶未已坐以遺失部籍逮下詔獄數月始釋罰米千石  
輸大同尋復罰米者再瑾誅復官致仕世宗初遣行人齎璽  
書存問賚羊酒令有司月給廩四石歲給役夫六人終其身  
嘉靖五年年八十有六卒贈太傅謚忠定士聰舉人罷官後  
不復仕士奇進士終湖廣參政少子士賢舉人爲開封同知  
孫廷瑋進士行太僕寺卿

李進字時勉曲沃人成化己丑進士初授戶部主事遷員外  
郎中督餉宣府出納稱平出知廣平府建石閘引河水灌田  
民食其利改濟南府遷四川參政歷江西河南布政擢副都  
御史巡撫宣府進戶部尚書會北部人犯諸將違節制敗於  
魚臺嶺上章自劾引疾歸進剔歷中外四十餘年清介自持

始終不變中外皆以人望推之

陳孜浮山人父福膂力善劍聞英廟北狩哭於縣庭誓以死  
難縣貳資以健馬至大同北門與虜戰斬敵甚多巡撫朱方  
上其功會大暑以不解甲七日勞憊而卒孜成化壬辰進士  
除知慈谿縣擢監察御史升湖廣副使歷官貴州左布政使  
所至皆有異政致仕歸總兵沐崑所贈贖卻不受時有明如  
霽月懸銀漢清似寒冰湛玉壺之詠後進階資德大夫居官  
雖久蕭然如寒士歸葬繼母至齋衣器以備葬具士論重其  
清介

因綱字叔大曲沃人禮子精楷書工古文詞成化丁酉舉人  
授滄州知州公正廉慈毫不苟取素衣如貧士民羅法於而  
論之不悛始加刑既卒貧不能還上下贈賻始得歸

莫不流涕祀滄州名宦

鄭傑洪洞人成化戊戌進士授大理寺寺丞舊寺不設刑具置之以儆罪囚自傑始往時侵盜官糧止擬常律因條奏當以法遣丞爲例升鎮江知府復除登州知府會有冤獄禱於神夜夢船中一虎身插三矢次日審曰此必周彪也其人叩伏冤者得釋人稱神明時蝗蔽天齋沐拜禱遂去不爲害民謠曰蝗去豈偶然明府一念真格天

王泰字道亨翼城人成化辛丑進士惴惴有內修歷知儀封衡水二縣升南京刑部主事選員外郎時劉瑾用事例索饋謝泰曰寺人之寵其識不遠以賄獲官吾不爲也遂乞致仕及瑾敗詔起福建副使歷升湖廣參政山東按察使居官清慎得失不驚尋謝病歸蒲陽林俊薦於冢宰楊一清云泰溫



粹類貫道孤特類君實中和兼備庶乎篤行君子也

李鉞太平人成化癸卯舉人宏治間知蓬萊縣遷登州府同知禦流賊有功升鞏昌知府累官河南僉事平獄革奸權豪斂跡後以疾歸

李浩字師孟曲沃人成化甲辰進士授都水主事尋改戶部父憂服闋起兵部車駕主事升員外郎奉勅清理畿內諸土田奪豪右侵占者若干頃還之民升職方郎中爲尙書馬鈞陽所稱重委攝諸司章奏歷升左右通政順天府尹時久旱疏論畿甸民疾苦事當罷行詔嘉納之居二年轉兵部右侍郎尋轉左疏愼郊圻固封守革冗費修戰具數事多見采納母憂闋拜禮部尙書食一品俸疏乞去位家居二十餘年素好學問文章著有南莊稿歸田集藏於家卒年八十有五賜

祭葬如例謚莊簡子鏞孫承華承志俱進士鏞仕御史歷府丞承華由行人進御史至九卿承志終環慶副使以李劉之亂督餉有功晉秩世有名德

邢霖字時望襄陵人讓子成化丁未進士官兵部武庫司郎中典百司柴薪銀兩卻羨餘以廉幹稱出爲長蘆運使正德丁卯因逆瑾用事解印綬歸延師儒以訓後進禁奢侈以維風俗又深明醫藥活人甚眾以上壽終

張遼蒲州人成化甲午舉人授陳留知縣挺持大體擊強悍舉廢弛豪猾革心去之日縣人爲建祠轉光州政聲益著

李紀字朝振潞州人成化乙酉舉人授故城知縣遷錦衣衛經歷臨洮府知府降長蘆鹽運司同知遷福建鹽運司運使甫一年致仕紀嚴毅沈默爲文滔滔如江河故城俗婚姻論

財紀爲立中正法不率輒痛治之有官田爲豪家侵據按籍  
責之悉吐實薄其租稅給民之無依者在臨洮以嚴明爲治  
請番漢雜處非操法無以遠惡巡撫有故舊販絲葛紀口某  
不能爲貴人僮而漁民也將執之其人懼而走在長蘆福建  
益峻潔自厲嘗以事入都諸商人供具道旁策馬亟趨過不  
少顧比及親戚子弟出篋笥視之惟圖書衣幘而已生平雅  
好吟咏所著有默菴集孫敏德進士累官陝西左布政使  
是紆守臨洮時何驛丞子景明方十歲紀奇之育於室親授  
之讀妻毛氏愛撫逾已子恒夜執鐙燭供課景明後以進士  
官副使詩名蓋世本紀敘也

楊奇字秀夫壺關人能之子成化辛丑進士授戶部主事宏  
治改元上裕國安民疏極言足食足兵之法在端本澄源進

陝西司郎中時甘肅弗靖奇奉敕整督軍餉將行上疏言備邊七事上嘉納之尋升嘉興知府改夔州有惠政民飲江水遠汲爲難鑿井得美泉以姓名之夔人感慕爲作生祠

李頤平遙人用志誠專孝聞鄉閭成化乙酉舉人通判鞏昌府歲饑勸富戶出粟以振全活甚眾暇日課農桑教民務本考績以寬廉著民立碑建祠凡二十餘處後遷温州府同知溫廉字志潔介休人成化戊子舉人授濟南府同知招撫流移奏除民害九年升雲南尋甸知州復除徽江府時土賊猖獗戮其巨魁餘悉解散以禮匡俗政聲益著府舊無城郭肇興版築並衙署皆所創建卒於官士民悲泣如親喪焉

文瑞介休人成化乙未進士授行人出使唐沈二府饋以金帛卻不受擢監察御史巡按畿甸有中貴侵民田瑞按法斷

歸之權倖悚然又巡山東百僚震肅時官舍有妖傷人瑞至妖滅值亢旱親出祈禱雨卽降人皆異之後升山東按察副使兵備遼陽節操愈勵卒於官囊笥蕭然

車憲石州人成化辛丑進士性慤直持己廉正初授刑部主事歷員外郎中與堂上官語是非無稍回互出知平涼府吏胥奉法唯謹藩府宗室亦無敢以私干者涖任八年遷本省參政入爲苑馬寺正卿擢右僉都御史巡撫宣府修舉邊政寔心有功績致仕歸以禮讓表俗及卒賜祭一壇

張翼介休人成化甲辰進士授刑部主事歷郎中出知保甯府遷本省兵備副使貴州湖廣參政擢右僉都御史巡撫甘肅尋召入理院事翼性耿介不妄取予釋褐後翔步郎署清望最著爲副憲日羌人屢肆劫掠督兵勦除悉警伏在甘肅

殫心區畫獲功一十六次比長臺端風采凜凜未幾請告歸卒

段正字以中澤州人成化乙酉經魁聯捷進士令元城日勤聽斷獄無留滯邑有水患多方疏塞民賴以安擢御史巡按河南貪墨望風而遁再按江西歲薦饑閩盜復起振災備兵布約束四十餘條得無事特命再巡一年遷浙江按察副使會大水規畫救治民免漂溺如在元城時尋以累謫柳州同知改汝甯汝甯科率重久爲民病力爭於守得損十之三四擢荊州知府歷河南右參政轉江西左參政所在興利除害都憲王恕稱爲一道福星卒年五十八貧不能治葬所著有介菴集柏臺公案諸程日記宦遊記

王道濩川人成化甲午舉人知朝邑縣正德戊寅大陽民田

千頃淪於河道請於當事以糧折布又縣當山陝要衝不置驛民不勝勞請得邵陽澄城協濟民獲休息遷判河南所著有六泉集

宋鑑字克明陽城人成化戊戌進士少有大志力學達旦不寐人以鐵眼呼之知舞陽縣廉剛嚴正加意學校尋擢御史執法不避權勢出知廬州除大奸去宿弊每行州縣孜孜問民疾苦而剗剔之在任七年治績爲天下最艱歸遂不出

田鐸字振之陽城人成化十四年進士授戶部主事遷員外郎郎中宏治二年命賑四川坐謫謫蓬州知州州東南有江洲八十二頃爲豪右所據鐸悉以還民建大小二十四橋又鑿三溪山以便行旅御史行部至蓬訝民寂無訟已乃知州無冤民也太息去薦擢廣東僉事遷四川參議不赴以老告

歸正德時劉瑾矯詔言鐸理廣東鹽法簿牒未明逮赴廣未就道而瑾誅或勸毋行鐸不聽行次九江卒年八十二見明紀循吏傳

畢璽高平人成化庚子舉人授任邱知縣剛果有爲修城池建橋梁值邊警民恃以不恐轉德州知州揚州府同知所在有治績升戶部郎中總理遼東糧儲轉兩淮鹽運使清操惠政歷久不忘著有石屏文集家乘餘錄

李瀚字叔淵其先翼城人徙沁水成化庚子舉鄉試第一明年成進士授樂亭令擢監察御史巡按陝西革茶馬夙弊密遣使擒終南山妖僧歷升右副都御史董漕政時榮王由運河之國貴璫冀得賄輒阻遏糧運適瀚會議北上白之王始不爲掇升吏部右侍郎尋轉左起廢疏壅士類允愜進南戶



部尙書論析公庾府帑戶口田賦盈縮之數歷歷如指諸掌  
疏請裁冗食節濫費廣儲蓄時廩藏空虛輸乘秋熟發帑金  
代兵餉積米數十萬斛尋告休歸子承恩正德庚午舉人良  
鄉知縣曾孫一鵬通判保定府

常軌沁水人成化辛丑進士授大理寺評事陟右寺副讞獄  
多所平反出爲河南僉事行部至密縣有平民被拷自誣伏  
爲盜者至西平及裕州有鄉曲豪民爲公私巨蠹者他官莫  
敢問軌爲雪其冤正其罪民翕然頌之尋卒於官旅櫬無費  
四年始克歸葬

白鑑字孔彰陽城人成化丙午舉人倜儻有大志授文登知  
縣政尙寬簡廉節自勵以憂歸起補杞縣杞稱繁劇訟牒盈  
庭剖析明當治行稱第一調漢陰值逆瑾流毒棄官歸瑾誅

起洛南一如歷三縣時居三載告歸百姓遮留若失慈母年九十有三卒

郭容字子仁渾源人成化乙酉舉人以博洽薦於朝召對便殿稱旨錫賚甚厚命以秩辭不受後任甯海知州興廢舉墜力除民害州濱海鄙陋無禮教容定條約婚嫁喪葬秩然有節立養濟院以惠貧民暇則按視疾苦條利民十六事力行之後督餉大同餉如期集美金千兩還所司人服其廉代歸以疾寓都門遂不起聞者無不悼惜

張安字定之大同人世襲百戶成化間以神木等處功升指揮僉事再以威甯海子功升山西行都司指揮僉事進指揮同知宏治間歷守朔州天城以都指揮使充大同遊擊將軍擢副總兵協守甯夏以賀蘭山功升都督僉事屢有白金文

綺蟒衣之賜正德間充總兵官尋鎮大同年六十疏乞致仕得請卒年七十五安生長代北家傳韜略天資凝重才兼智勇尤能練士卒知幾料敵自偏裨至大將四五十年間大小數十餘戰未嘗敗北前後巡撫總制多薦之以爲鎮將第一子輒軌俱有父風

王縉山陰人成化中貢生授臨邑縣知縣性清約勤於民事早起據公堂治文書不輟民有以訟至者輒情理諭之不辜笞以荆條不苛責也間復單騎巡阡陌中呼農夫田婦問耕織事如家人父子有特操遇義不可不惜以去就爭邑有數大姓爲盜誣扳部使者屬縉鞠之無所驗力白其寃部使者移陵邑覆訊悉論死縉佛然卽日引疾去閱兩月眞盜發他邑賊證具在部使者愧甚特疏薦終不就

王雲鳳字應韶和順人父佐南京戶部尙書雲鳳弱冠舉成化二十年進士授禮部主客主事宏治九年再遷祠祭司中請天下府州縣學校悉立名宦鄉賢祠遂爲定制副使楊茂言事得罪抗章救之請斬中官李廣以謝天下直聲震於時先後多論建又數代尙書條奏帝亦識其名而廣憾不置會南郊視牲乘馬駕後廣構下詔獄謫陝州知州廣死擢陝西提學僉事正德初歷山東按察使所至皆以嚴著母喪除張綵薦起國子祭酒綵誅言官劾之遂乞休改南京右通政謝病歸楊一清爲吏部起右僉都御史巡撫宣府疏請建儲及免調邊軍父喪除起督兩浙鹽課再疏辭免未幾卒

白思明平定人成化丙戌進士知嘉定縣縣濱海澎湖害稼爲文以祭一夜悉徙去築長隄千餘丈接上海崑山防海水

泛溢入爲吏部文選主事歷員外遷考功文選兩司郎中再遷太僕寺少卿擢右僉都御史巡撫延綏先是掌選司時權貴請託峻拒不許至是遂嫉言官論列降知兗州府尙書王恕三疏辨白胥不報調廣平入爲太僕寺少卿以內艱歸旣免喪將治藝圃爲終老計當道敦逼入都卒於邸訃聞遣官諭祭贈卹著有西軒集行於世弟思義舉於鄉累官宗人府經歷思義子金舉人累官陝西僉事胥有賢聲

楊傑字廷俊平定人有志操在太學爲冢宰耿好問所重成化壬辰成進士授翰林院編修遷侍講充經筵講官嘗進講尙書無逸篇至文王卑服卽康功田功反覆諷諭辭意剴至先是上頗事服飾至是感動悉屏去不復御尋以修憲宗實錄成遷司經局洗馬主應天鄉試還充日講官並東宮講讀

官與修會典未成卒訃聞賜祭一壇

喬宇字希大樂平人祖毅工部左侍郎父鳳職方郎中皆以清節顯宇少學於楊一清成化二十年舉進士復從李東陽遊爲古文詞有名已授禮部主事宏治初吏部尙書王恕調宇文選三遷至郎中門無私謁擢太常少卿武宗初祀中鎮西海還條上軍民困苦六事已遷光祿卿歷戶部左侍郎劉瑾敗獨無所染拜南京禮部尙書寢宮災率同列言視朝不勤經筵久輟國本未建義子猥多番僧處禁寺優伶侍起居立皇店留邊兵習戰鬪土木繁興織造不息凡十事不省久之改兵部參贊機務時上遠巡請早建儲貳上將自擊寇復偕同列諫不報未幾甯王宸濠反宇上其所移檄嚴爲警備而談笑自如時攜客燕城外密察地險易置戍守綜理周密

丙外宴然鎮守中官劉瑯通賊預伏死土宇刺得其情詰瑯  
用事者瑯不敢動乃大索城中斬所伏壯士三百人懸首江  
上宸濠失內應且知有備不敢東賜勅獎勞上至南京詔百  
官戎服朝明年正旦宇率諸臣朝服賀江彬索城門鑰宇曰  
守備者所以謹非常禁城鎖鑰孰敢索亦孰敢予雖天子詔  
不可得乃已彬矯旨求索日數十至必廷白之彬亦稍止而  
亟欲譖去宇賴守備太監王偉調護彬謀不行宇三疏請回  
鑾又伏闕請駕旋扈至揚州明年加太子太保論保障功復  
加少保世宗初召爲吏部尙書宇自爲選郎有人偷竪及是  
銓政一清凡爲權倖黜者皆起列席位旣而所執漸不聽與  
府需次官六十三人乞遷宇言此輩虛隸名籍與見供事者  
不同黜罰有差皆怨上欲封駮馬都尉崔元爲侯外戚蔣輪

邵喜爲伯宇不可又詔進壽甯侯張鶴齡爲公封后父陳萬言爲伯授萬言子紹祖尙寶丞宇言累朝太后戚屬無生封公者張巒亦沒後贈今奈何以父贈爲子封萬言封伯視巒更驟而子授尙寶非制願守典章以垂萬世並不從史道訐楊廷和宇言道挾私下之獄曹嘉助道劾宇宇求罷命趣視事上欲加興獻帝皇號宇言加皇於本生之親則干正統非所以重宗廟正名分及禮官請稱本生考上改稱本生皇考又詔建廟於大內宇等復連章諫特旨用席書爲禮部尙書宇又偕九卿言近罷汪俊用席書謫馬明衡季本陳逅召張璉桂萼霍韜舉措乖違人心駭愕且書特出內降此祖宗來所未有乞令俊與書各仍舊職宥明衡等止璉萼毋召尋復請罷張璉桂萼及書而出呂柟鄒守益於獄會璉萼等至皆



用爲學士又言學士最清華而俸莠等居之誰復肯與同列  
被切責宇遂乞休許馳傳給夫廩歸御史許中劉隅等請留  
上曰朕非不用宇宇自以疾求去耳後明倫大典成奪官楊  
一清卒宇渡江弔之南都父老皆出迎曰活我者公也宇詩  
文雄雋兼通篆籀性好山水嘗陟太華巔遇虎僕夫皆驚仆  
宇端坐不動虎徐帖尾去家居服御若寒士身沒二妾劉許  
殉穆宗初復官贈少傅謚莊簡

李岱字宗岳樂平人家貧躬杵日以養親登成化丁未進士  
擢刑科給事中上檢身求言數事劾寵幸蔣琮尙書鄭時內  
官張廷等置於法白都御史秦紘冤又力言前威甯伯王越  
不當黃緣起用遷南光祿寺少卿上供天鵝鹿脯皆以焚籠  
生致於嶺海五六千里外民深以爲病岱言於太宰倪罷之

上供法醞每歲酒人網送用舟八十餘艘船夫爲奸且不時至岱爲之籍使有統紀弊遂絕正德三年考績至京時劉瑾用事岱無所餽勒致仕瑾誅補陝西參政子天衢宏治丙辰進士授戶部主事督稅臨清亦以弗賂瑾出爲陳州守後歷陝西參議歸囊篋如洗

趙清代州人成化癸卯舉人授濟河知縣適勘事外出過邑之洪店有盜王山殺人於民人王臻之側眾誣執臻臻不勝榜掠誣服清還至洪店一牛奔向清跪而悲鳴若有所訴清問之則臻牛也清曰臻冤乎遂辨釋臻然殺人者未得眾猶疑後鞠大盜王山因得其情齊河人稱神明作青牛記

張岫安邑人知縣琦子成化丙戌進士累官右副都御史岫侍父高陵有僉事欲辱其父岫挺入與之辨僉事媿伏及通

籍選授御史好善嫉邪以正直著當撫遼時遼人爲御史者將監山西試入謁請其子名蓋欲登之賢書也卽令子稱疾不與試鄰人有鬻產者其子售焉聞之不樂亟命還鄰人固不肯爲倍增其直嘗寓書家人欲爲其母市絹不足俟領俸鄉人寶之比于魯公之乞米云卒後賜祭葬如例

張翰字文鳳平陸人成化戊子舉人授朝邑教諭敦本崇實訓課有方升翰林孔目遷侍書與纂修憲宗實錄錫敕命拜檢討侍經筵奸觸權奸左遷重慶同知有惠政郡人勒石紀之升臨洮知府計息兵變地方賴以安劉瑾索賄遂歸總制彭以詩別之有孤忠誣逆宦萬代播芳名之句瑾怒不已罰米五百石瑾誅獲免卒年七十五歲

張芮安邑人成化戊戌進士官翰林武宗在青宮芮爲侍讀

累遷學院學士值劉瑾用事威儀薰灼公卿望塵拜伏芮不爲禮瑾銜之誣以他事左遷鎮江同知後起爲太常卿兩乞休不允卒於官子惇甫正德中進士官至主事博閱羣書著有澹泉集

李泰字時雍聞喜人沈默嗜學言動不苟嘗揭朱子書孝弟忠信禮義廉恥八字詔學者曰此立命安身符也中成化甲午舉人授林縣知縣爲政以禮風清弊革以艱歸補恩縣在任七載境內肅然及致仕恩人挽送自邑達境士如失父母哭聲不絕抵家杜門讀書非公不造邑庭三原馬光祿理題曰貞分先生

暢亨字文通河津人成化十四年進士由長垣知縣擢御史巡按浙江歲饑奏罷上供綾紗等物考察官吏奏免百五十

餘人宏治元年二月景甯縣屏風山異獸萬餘大如羊色白  
銜尾浮空去亨請罷溫處銀鑛而置鎮守中官張慶于法章  
下銀課得減責慶陳狀慶因許亨工科給事中龐泮言亨直  
詔停俸三月亨又劾僉事鄒滂滂亦許亨慶等構之謫涇陽  
知縣卒

韓重字純夫絳州人成化戊戌進士性通敏貌魁梧初授禮  
科給事中歷本科都給事中諫萬貴如過寵又疏陳西僧煽  
惑出爲陝西參政遷右布政使清軍務督馬政以最擢應天  
府尹廉敏益著降旨褒論補順天府尹遷右副都御史巡撫  
遼陽劾奸宦梁圯貪橫罷之擢南京兵部侍郎處公署中遇  
事直行已意改北京兵部進南京工部尙書疏請止不急工  
役得俞允爲劉瑾所嫉因求致仕命下瑾令所私計算財費

鈞致年餘無所得居廣陵聽勘疽發背卒曾孫科隆慶間貢生任濟南通判廉介有祖風

陶揆字廷信絳州人父銓進士陝西右參議揆舉成化七年鄉試第一十七年成進士授刑部主事宏治初進員外郎出爲固原兵備副使練士卒廣芻粟歷九年部內宴如遷福建按察使浙江左布政使正德初以右副都御史巡撫河南遷刑部右侍郎陝西遊擊徐謙訐御史李高謙故劉瑾黨行厚賂欲中高危法揆往按高直瑾怒假他事下揆詔獄褫其職罰米四百石瑾誅起左副都御史總督漕運兼巡撫淮揚諸府轉南京刑部侍郎進右都御史巡視浙江會甯紹興風大作民居漂沒萬數出帑金振救而大築隄於蕭山會稽凡五萬餘丈又奏設兵備道守要害防賊王浩八黨出沒更遣將

擊斬其渠魁遂城開化常山遂安蘭谿境內以靖復命總督  
漕運七疏乞歸世宗初起故官凡三督漕軍民不嚴而肅揆  
性清儉飯惟一蔬行李止三竹筴尋加戶部尚書嘉靖元年  
召拜工部尚書冬改南京兵部加太子少保未幾屢乞休加  
太子太保乘傳歸有司歲時存問卒年八十有四贈少保謚  
恭介子滋別有傳

吳珉靈石人成化己丑進士屢官南京都察院右副都御史  
性峭直痛父早逝事母鄭氏以孝稱初官吏部主銓選公愼  
自矢巡撫甘肅邊陲晏然及泄都憲益厲風裁表率諸御史  
當時有清不過韓文直不過吳珉之語以上成化年

崔侃陽曲人宏治庚戌進士官甯知府操守廉明政績大  
著府有疑獄悉得其情時流賊肆劫掠侃以忤逆瑾得請歸

田卽引眾避遁一方賴免林居三十餘年齋粥自甘杜門不出蜀人祀入名宦祠

陳璘字邦瑞陽曲人宏治癸丑進士授太常博士從享南郊爲上所知選監察御史巡居庸關躬歷險阨相地勢增戍兵再巡山東疏罷礦役引蔡河入曹利運道修理闕里孔廟外轉浙江僉事遷陝西苑馬少卿少師楊一清總制三邊薦授參政督軍儲士馬皆宿飽遷河南按察使凡豪猾倚宗室爲奸利者痛治之鎮守王太監素橫肆震其威亦奉法唯謹遷右布政使轉左擢都御史巡撫湖廣以邊才改延綏延推兵部侍郎念父母年高請終養不許武廟西巡駐蹕延綏時江彬用事張甚璘威望素著凡事持大體不詭隨彬爲斂迹未幾父母訃後先至慟哭請終制廷議駕南巡上郡重鎮非璘



不能彈壓奏令奪情候代比世廟入繼始得歸治喪事璘洵  
歷中外功績茂著初通籍政府授意令一來謁當授庶常卒  
不往識者已見其梗槩云

閻睿字汝思祁縣人宏治己未進士授永清令縣蝗睿發粟  
易蝗民捕之積萬餘石得不災事聞有銀幣之勞既以公事  
至霸州州人願借以爲守縣人爭之訟于中丞洪洪曰閻令  
風憲品豈郡縣所能留哉尋召入永清人留靴誌感正德辛  
未流賊至郊賊首齊彥明睿舊抵禁也感睿德繫馬數匹於  
門泣拜而去巡撫李毅齋寄詩曰強暴思恩曾繫馬市民懷  
德願留靴拜陝西道監察御史清理甘肅諸鎮倉糧糧多虧  
折官不能償睿革兜攬兌給之弊設法取盈釋淹滯之員六  
十人舊例官軍馬斃本人自賠有典妻買馬者睿命屯地每

頃出銀一錢以給營馬之用差滿復命疏陳邊務數條悉蒙採納升浙江按察司副使巡視海道豪右斂跡以疾告歸卒年七十二

薄彥徽陽曲人宏治九年進士爲南京御史論道士崔志端不可玷尙書正德初奄黨竊柄偕同官陸崑等極論馬永成魏彬劉瑾傳興羅祥谷大用輩罪疏上而劉健謝遷已被逐彥徽爲首復上公疏請留健遷罪永成瑾等悉逮下詔獄榜掠杖三十除名歸

張天相陽曲人宏治己未進士陝西慶陽知府有循吏風民甚戴之

寇天敘字子惇榆次人由宏治辛酉鄉舉入太學與崔銑呂柟善登正德三年進士除南京大理評事升甯波知府累遷

應天府丞武宗駐南京從官衛士十餘萬近倖多求索尹齊宗道憂卒天敘攝尹事日青衣阜帽坐堂上江彬使至好語之曰民窮官帑乏無可結歡丞專待譴耳彬使累至皆然彬亦止他權倖有求則曰俟面奏即予中官拘妓女數百多餓死以天敘言得釋禁軍擾民物天敘募人與搏而兵部尚書喬宇亦選拳勇者與搏戲禁軍傷慙且畏不敢橫駕駐九月南京不大困者天敘與宇力也嘉靖三年以右僉都御史巡撫甘肅至則專務安靜徭薄賦節費以紓民力申飭官箴以警屬吏回賊犯三丹擒其長脫脫木兒西域貢獅子犀牛西狗請卻之不聽六年進右副都御史巡撫陝西寇入固原擊敗之斬首百餘又討平大盜王居等累賜銀幣厯刑部兵部侍郎卒

陳璧字德如太谷人宏治壬戌進士除行人司司副屢奉命出使藩邸卻餽遺不受遷刑部員外郎歷郎中讞獄得情雖權貴不爲動出爲陝西左參議會大軍剿擒賊以饋餉功賜彩幣銀牌遷湖廣副使奉勅整飭郴桂衛永諸路兵備又以剿擒蠻功食從三品俸復奉勅撫治荆襄鄖漢等流民公正廉約直指以其績上聞一年丁艱歸遂不復出卒後劉龍誌其墓

解一經交城人宏治甲子舉人授平原知縣廉介寬仁遇荒捐俸以賑升南京戶部員外郎中雲南廣西知府後乞歸隆慶間進階亞中大夫卒

張潤字汝霖臨汾人宏治戊午解元壬戌進士授宜陽令擢刑科給事中奉詔覈甘肅邊儲稽察精明河外震懼累遷戶

科都給事中時盜賊死夏水旱流移詣嚴紀律酌轉輸時振  
恤廣招撫擢順天府丞尋轉左僉都御史巡撫順天條上邊  
民疾苦及便宜十餘事郊圻盜起邊復有警措授方略盜平  
警熄丁外艱起撫甯夏申講學校屯田鹽馬諸路召還以九  
載績晉左副都御史轉兵部右侍郎又轉戶部左侍郎督太  
倉剗洗奸蠹兵民歡服晉工部尚書時大工並興潤勤省閔  
請酌緩急爲先後力專功過費減舊之半屢蒙褒賜以內艱  
歸起南吏部尚書甄別去留輿情咸服改戶部仍督太倉告  
歸年八十三卒贈太子少保謚恭肅

邢彪曲沃人宏治初以貢授三原縣丞博學篤行公廉正直  
下鄉收糧勘事自裹乾糶無分毫擾民以考察罷方自餉邊  
而歸途次聞信卽不入邑然貧不能歸乃擇咸甯僻處陋室

以居朝夕玩誦經史有得輒筆之雖食不充口衣無完服而其容如溫丹氣常浩然入三原名宦

翟敬字行簡猗氏人宏治庚戌進士授翰林院檢討性耿介遇權貴用事者庭斥其奸聞者汗下免官歸數年補河南布政司照磨遷休甯知縣平徭役理疑獄一時以青天呼之後官遼東行太僕寺少卿致仕歸卒年九十六

鄭岳字汝華蒲州人宏治癸丑進士授戶部主事遷員外郎出爲湖廣僉事遷廣西副使調廣東所至皆有異政遷江西按察使歷左右布政使勸副使李夢陽御史江萬實許奏事爲逆藩宸濠所陷罷歸宸濠敗起四川右布政使以母喪不起嘉靖初擢右副都御史巡撫江西旣至請振恤受兵郡縣論次討平逆藩軍功贈祀死事諸臣未三月擢大理寺卿疏

陳時政皆切中遷兵部右侍郎尋轉左大同兵變議令首領官各誅首惡事立定總兵桂勇有平逆功大璫奪與其弟姪力駁正之權倖胥側目羣起媒孽其短因致仕歸家居十五年薦起者六卒不用蓋以議大禮爲張桂諸人所忌云

王璽猗氏人宏治戊午舉人嘗讀書桃花洞掘地得一石文曰大將王璽益自負正德辛未成進士除行人承命出使以廉介自重册封列藩一介不染備兵甯夏謹畏平恕人不敢欺張恭肅爲巡撫議以代己會丁內艱歸再備兵榆林遭艱歸家居十五年卒識者惜其才之不盡云

侯璽長子人宏治己酉舉人任白水知縣嚴明能斷案無留牘先是邑多逋賦璽督催有法民皆樂輸尋調澄城縣白水民思之祀名宦累官河南僉事致仕歸

劉鳳儀字天瑞襄垣人潞長子宏治庚戌進士授高密知縣興學校廣儲蓄彌盜賊招撫逃亡二千餘家旱蝗爲文自責蝗入海死升戶部主事遷刑部員外郎

劉龍字舜卿襄垣人宏治己未進士廷對一甲三人及第授編修充經筵講官修孝宗實錄改授兵部職方主事升吏部考功員外郎尋升左春坊左中允兼翰林院修撰侍講學士兩典順天鄉試掌院事嘉靖初開筵進講簡暢明切扈蹕南郊修武宗實錄升禮部右侍郎尋轉左日講如故帝欲以太后廟謁龍執祖訓不可凡三上章竟報罷升南京吏部尙書考察京職去留允當改南兵部尙書裁中貴人以法雖魏國永康撫甯亦辭假借時宣大有警條上機宜六事濟川諸衛船工料請敕印差官經理俾以時給錦衣衛沙州湖塘之利



奏遣其屬偕督屯使者勾稽如法補四營軍丁盈萬伍遂充  
編黃船軍往返以三月爲限歸塢還營有定期不得影匿空  
耗月糧江北飛熊等衛屯所鹽徒肆行鈔暴奏遷三衛屯軍  
以都指揮領之列營操備盜乃息考選軍政禁絕請託汰黜  
莫敢譁歷尚書六年召還屢疏乞休特允馳驛歸卒年七十  
八贈太子太保諡文安

賈璇汾州人宏治庚戌進士授戶部主事歷員外郎中嘗督  
鈔揚州羨餘盡歸之官行賑江北調度有方所全活甚眾正  
德初守闕乞誅劉瑾等不報出補陝西右參議未幾爲瑾所  
陷歸及瑾伏誅朝廷將大用之以目疾辭時論惜焉

石瓚介休人宏治壬子舉人授羅山知縣時遇流賊亂鄰縣  
棄城走寄印於瓚者十一瓚孤城獨守鏖戰月餘殺賊有功

兵部奏請升俸一級仍管縣事招集流民撫卹備至知府  
謂羅民曰汝等天堂上百姓耶後升萊州府通判以親老  
歸遂不復仕羅山民爲立祠祀焉

任良弼平遙人宏治癸丑進士選翰林院庶吉士授刑科左  
給事中轉吏科都給事中持論侃侃彈劾不避權貴遷通政  
司左參議忤逆璫劉瑾降補建昌府通判復矯詔下獄謫戍  
遼陽持節自如瑾誅起通政司右參議良弼居官三十年澹  
泊如書生名重朝野與兄稱文壇雙壁比歿家惟琴書

嚴泰汾州人宏治丙辰進士官戶部主事半裁峻潔不妄取  
予督鈔蘇州蔬食飲水而已鈔關有便民小關後并徵稅泰  
至罷之吳人謠曰許墅灘頭無濁水蘇州關上有青天後歷  
登州知府廉平爲東省最卒以介直忤時抗疏歸杜門罕交

接服母喪終身不除

高崇熙石州人宏治庚戌進士官至四川巡撫蔭世襲錦衣衛千戶其事蹟湮失考正德六年二月諭都察院右副都御史高崇熙勅有云今保甯江津等處殘賊復聚爲患爾會同總兵官楊宏征剿藍五等餘黨同副總兵王憲剿殺江津強賊朕念彼處地方四年用兵軍民困憊已極爾須加意撫恤設法賑濟存問疾苦寬釋脅從十年八月贈右都御史高崇熙誥有云事有定論乃追念其前功故都察院御史高崇熙器識恢宏性資莊重累遷臬府才猷振乎綱紀兩擢藩司政克宣夫德化以蜀寇之未甯致王師之見討乃從僉議晉陟中丞彰國典以勵人心飭兵機而鼓士氣羣方漸息謠歌頌之將興三捷交馳不風聲之益振顧其推誠待物竭力保民

豈期釜內之魂復有柙中之變雖勢難再振而功未全收爰  
召北還遂致中殞十一年四月諭祭文有云爾性資敏達器  
宇魁梧發跡賢科擢司風紀歷官藩臬綽著能聲晉佐都臺  
往撫西蜀時因盜起受命臨戎捷報既聞賊氛復熾事出不  
意遂致人言方在申誣胡遽淪沒觀此則崇熙累官及功績  
大概可見弟崇明官長垣縣丞擢知邱縣亦有治績

辛文淵字道深石州人宏治癸丑進士知濬縣遭母憂服闋  
補固安縣遷知無爲州轉河間府同知忤宦官劉瑾逮獄謫  
廣東化州同知未幾遷河南汝甯府尋致仕以御史薦起彰  
德府時山東盜賊縱橫而登萊間尤甚乃以文淵知萊州府  
至則浚隍崇墉以忠義激勸其民而忌文淵者方據要津或  
勸以饋遺免禍文淵不從復棄官歸文淵性剛直所至有聲

張禮石州人宏治丙辰進士知博興縣祀鄉賢事實無可考  
辛柱石州人宏治甲子舉人知寶豐縣遷永平府同知誥封  
戶部郎中祀鄉賢事實無可考

孟春澤州人宏治丙辰進士天性剛方才猷超邁初授南刑  
曹清慎有聲守嚴州以廉官第一擢同寺巡撫宣府威惠并  
著軍民賴之以直道爲江彬所排落職嘉靖初薦起巡撫順  
天聲績赫奕時大旱奏辨御史許銘寃并乞斬貪弁暨宸濠  
逆黨以答天譴及佐銓政清譽著聞世廟特賜行不自欺四  
字以旌之未幾大獄起復以直言忤時宰遂與顏頤壽馬錄  
同時削籍疾革囑斂以青袍角帶贈工部尚書子陽別有傳  
王玘字邦器陽城人宏治己未進士初授刑部主事繼補戶  
部屢奉監督倉差能剔弊大司農韓忠定以廉靜稱之遷刑

部員外郎升山東司郎中時逆瑾尙嚴刻玳持平恕爲瑾所惡思中之無可乘未幾遷陝西僉事川陝總督洪聞其賢取軍前贊畫瑾誅調河南分巡汝甯道劇賊劉六等踞上蔡逼汝城玳誓死守已而賊攻城遭挫劫奔潰眾將慶功玳以賊首尙在不可乃密奏賊可平狀朝命撲剿有賊黨汝人趙秀母繫獄玳出之秀感激思効適賊首趙璠與劉六等會兵秀急走報玳玳率部下官兵盡擒之解送軍門紀功官吳玉榮索賄不應人皆優敘玳止賞綵帛銀牌而已歷兵備薊州及山東參政俱有績後解綬歸卒於家

張軌陽城人宏治辛酉舉人溫良貞諒勤慎廉能任隆慶知州時武宗北狩三駐蹕於境屢倖江彬播弄威福暨東廠太監張銳守備孫璽周瑄輩求索無厭軌不爲動有皇義子馬

元吉者其姪以事屬按軌以正法繩之尋誣以事奉旨東廠處分竟辯白巡按章綸擊節嘆曰處危險而存心不失其正當紛擾而遇事不避其難直哉守也升萊州府同知居萊三載才守益著卒於官

武思明陵川人宏治壬戌進士爲金壇知縣性質樸衣食供用澹若寒士愛民好士汲汲如不暇蒞政未及期奸宄吏胥遁迹人以神明日之居鄉卓有志操推誠立教一時科目多出其門

田天澤應州人宏治壬子舉人任耀州知州時流賊圖定興攻城幾陷天澤督兵拒走之有巨璫挾寵恣睢陝西諸郡縣類被科索跡且至耀天澤曰他州自有耀州自無致政歸卒贈通議大夫

成文山陰人宏治十五年進士由知縣擢御史正德中阿爾  
禿厮亦不剌與小王子戰敗引所部駐甘肅塞外時入寇掠  
陷堡塞五十三巡撫張翼鎮守太監朱彬反冒奏首功文出  
巡按盡發其奸翼等賄中人傾文會文劾僉事趙應龍應龍  
亦訐文細事遂被逮斥爲民嘉靖中起用累官右副都御史  
巡撫遼東告歸卒

常在榆社人父經成化中舉人任山東單縣有惠政在登宏  
治乙丑進士任山陽知縣持身廉謹撫民仁恕召爲御史出  
按遼東陝西激揚得體遷河間知府值凶荒悉心振恤遠者  
遣官分給近者日哺以粥又溫疫大作施藥餌救濟多所全  
活民甚德之子應文字汝實嘉靖壬辰進士任上海知縣公  
明仁恕甫三月政通人和以不習水土辭歸所著有左傳要



語等書

鄒夔平定人宏治十五年進士授行人奉命之趙府酬金不受擢戶科給事中改禮科正德五年出覈延綏戰功劉瑾屬其私人夔念從之則違國典不從則得禍遂自經死瑾誅復官賜祭且卹其家

謝璽代州人甯波推官鐸子宏治庚戌進士授容城知縣多惠政民有去後思厯按察司僉事以破萬山寇功賜金幣家居廉靜子國表進士國詔國徵舉人表子之莆詔子蘭俱進士

劉繹字以成代州人宏治丙辰進士授戶部主事遷郎中督運遼東糧儲正德中不肯賄瑾瑾怒械至京師以大枷枷之同鄉有王某者侍左右晝夜不離月餘得不死冢宰張爲

言於瑾罷爲民後起監察御史遷衛輝知府值賊劉六等剽掠豫中竭力守禦遷長蘆鹽運司運使致仕歸初釋荷枷時有黃冠至邸遺藥一丸謂其家人曰日剝一分食之藥盡則難盡矣是日釋夢仙人自雲中下納藥口中既覺猶有餘香而監守者亦言老人來送藥忽不見一時相傳以爲異事云李貫字一之河曲人宏治己酉舉人授成都知縣補孟縣有能聲時流賊趙風子等攻掠山左郡縣薦爲曹州知州賊至城下人皆惶懼貫厲聲誓眾曰吾輩食君祿而貽君父憂爲生民恥何顏立天地間能爲我殺賊拒敵者國有重賞否則妻子爲擒其何能活眾奮遂率其子九麟募城中少年百人邀賊截擊斬獲數十賊遂奔遁事聞優賞有差旋移邳州築紫金等隘口一十八處清慎果毅巖疆用奠以老母乞終養

歸

馬騃字世用夏縣人武定判忱子宏治丙辰進士初官行人選工科給事中疏論李廣張鶴齡大爲孝廟所賞正德初遷刑科都給事中充戊辰廷試掌卷官大臣焦芳欲子黃中爲殿魁騃取呂柟爲狀頭有附逆瑾入給諫者騃斥以無恥又自川歸與張深父同宿館舍不交一言憾作出爲淮南推官清獄囚理冤抑贖張生之罪旌何女申婦之烈治行居第一以瑾怒未釋僅轉松江同知擢知饒州府補鄖陽府鄖陽山路崎險建議令有罪者修路自贖遂爲坦途又創浮橋葺廢坊修舉廢墜教化大行卒爲忌者所中免官歸騃剛直重信義人有急難輒振濟之不少吝如捐金歸楊俊喪代僉事沙立償宿逋者事非一著有梅軒手簡諸集藏於家

劉良臣字堯卿芮城人宏治辛酉舉人授揚州通判改陝西平涼府操守清正學問該博歸田後閉戶讀書足跡不入城市終其身言動不苟其詩賦至今人傳誦之

楊謙聞喜人宏治壬子舉人知武城縣以才堪治繁調諸城復謫平山衛知事武城諸城父老千餘赴闕爭保銓部以單縣尤劇調單縣流賊聞名遠遁卒保城池蒙旌異進二級子勛肖嘉靖庚子舉人授洛川知縣政簡刑清識者謂有宓子之風

文皓字孔賜垣曲人宋潞公苗裔家甚貧晝鬻薪供父母夜則乘月讀書終夕不輟宏治丙辰進士知平原縣著喻民詩及民情利病條約屢折疑獄丁內艱上官熟其清苦檄賻贈之卻弗受補衡水縣清河奸民以田千頃投獻德府居人屢

奏辨不能直勘得其實立返諸民擢監察御史清查遼東軍儲疏劾布按大吏時逆瑾用事道臣差回必以賄進皓獨無又治其私人孫恭如法瑾銜之屢遣人伺察無所得後往南京照刷文卷丁父喪衰服復命猶劾國公以下若干人補河南道疏論留都張尙書附逆瑾狀侍經筵劾中貴橫肆又上保民息盜六事並不報出爲河南副使督理河道令民五里內者赴工五里外者輸銀工成民不知勞魯山有習白蓮教者誅其首惡餘悉散遣歸農粒任三年再疏所致仕家居二十年卒

陳希良絳州人宏治戊午舉人性嚴毅爲真定推官定州臺楊錫以產故控於巡撫巡撫委希良鞫之錫因以錦衣寇樹太監張雄書求庇希良不受繩以法相與雄憤甚嗾錫訐希

良陷於囹圄竟死嘉靖改元州守李文潔始以狀上聞曹于  
汴爲之贊

李應奎絳州人宏治甲子舉人授平山知縣開誠布公與民  
相信凡八年升陝州知州有楊昆父子含冤下獄應奎得其  
情力爲辨巡按執不可辨益力竟忤坐罷巡按以他事罷昆  
冤亦白平山祀入名宦

郭韶霍州人宏治己未進士涉文史善騎射初知東安縣課  
最擢御史以王親例改甯國府同知操履方剛不阿權貴甯  
入立碑頌之升南京禮部郎中復自陳改湖廣兵備僉事鎮  
平監軍大破隲蘭巨寇又擒剿湖南流寇薦升四川參議陝  
西西甯兵備地方甯輯麥秀八岐中丞林廷玉東渠李璋各  
有歌詩贊頌尋升山東左布政使

以上宏  
治年

王範陽曲人正德庚午舉人授歸德知州會流賊數萬攻劫  
咸欲棄城走範諭以大義設法調度卒保無虞有大姓挺人  
至死行金脫罪不受坐以法補陝州始終如一後罷官總督  
翁萬達禮聘籌邊且奏記委用辭疾歸

張文明字應奎陽曲人正德六年進士授行人擢御史巡按  
遼東尋按陝西鎮守中官廖堂貪恣文明捕治其爪牙二十  
四人堂大恨會車駕幸延綏文明馳疏諫極陳災異且言江  
彬逢惡導非亟宜行誅朝臣匡救無聞亦當罰治不省旣而  
文明朝行在諸權倖扈從者力裁抑之所需多不應司禮太  
監張忠譖於帝言諸生毆旗校文明縱勿治帝怒命械赴京  
下詔獄明年春言官交章請宥不報比駕旋命執至豹房將  
親鞫文明自謂必死及見忽命釋之謫電白典史世宗立召

復故官尋出爲松江知府甫蒞任卒巡按御史馬錄頌其忠  
詔贈太常少卿

侯綸太原左衛人幼有異質嗜讀書於易學尤邃正德辛未  
進士授戶部主事歷禮部郎中出爲湖廣副使伸雪冤獄遇  
歲荒流離載道繪饑民圖上之得旨振救全活無算嘗督大  
工出入會計雖錙銖必慎吏不得緣爲姦省費以巨萬計歷  
戶部侍郎子汝諒進士累官都御史亦以廉敏有聲

王卿字良佐太原人正德甲戌進士令上海武宗南巡有緣  
爲姦利者卿抗諸邀索悉不應但日車駕過日供不供自有  
令民賴以安歲災設法賑濟時疫流行捐藥餌調治抑遏刁  
頑理剔冤滯終戶部主事

解一貫字曾唯交城人正德十六年進士除工科給事中陳



山西通志卷一百二十一 刑罰 四  
講學修德親賢孝親任相遠奸用諫謹令戒欲恤民十事世  
宗嘉納之嘉靖元年偕御史出覈牧馬草場太監閻洪奏遣  
中官一人與俱力言不可乃已還劾太監谷大用李璽奪產  
殃民罪由是內臣勛戚莊田卒歸之民時營后父陳萬言第  
力請裁節復助楊廷和爭織造皆不納歷刑科左右給事中  
進吏科教授王价錄事錢子助以考察罷假議禮希復用一  
貫言如此將壞祖宗百年制事竟寢張璉桂萼擊費宏一貫  
言璉萼平生奸險特以議禮一事偶合聖心超擢以來憑恃  
寵靈凌轢朝士與宏積怨欲奪其位而居之苟其計得行則  
奸邪氣勢愈增善類中傷無已天下事將大有可慮者詔下  
所司璉萼等銜不已竟謫開州判官以卒

張裕太平人正德中貢授臨昭知縣丁艱歸補安定知縣勤

政愛民廢墜修舉歲大饑多方振救又捐俸煮粥全活甚眾  
升安樂知州過家病卒安定百姓聞之素服肖像以祀

史魯字宗道蒲州人南陽經歷臣子正德戊辰進士授鎮江  
推官性剛毅涖政嚴明數平反冤獄有懷金謝者峻拒不受  
太宰某以刺來爲人干請裂以還之治其人如法擢南京刑  
科給事中章二十餘上中劾冢宰及參贊司馬守備太監並  
逆藩宸濠奸謀尤偉尋爲倖臣錢甯所忌罷官歸家居閉門  
高臥安貧樂道蒲人謂爲楊貞奄瑩後一人

郭震蒲州人正德戊辰進士授大理司評事累官河南僉事  
時流賊騷徐豫間震防禦保障屢著奇謀潁人立生祠祀之  
終遼東苑馬少卿

楊守禮字秉節蒲州人正德六年進士除戶部主事嘉靖初

累遷湖廣僉事以計擒公安賊魁坐事謫判敘州累遷右副都御史巡撫四川與副將何卿平諸番賚銀幣初守禮貶敘州爲僉事張文奎所辱至是文奎遷四川參議摭他事訐奏詔俱解職守禮才器敏達中外以爲能工部尙書秦金等會薦起河南參政再遷右副都御史巡撫甯夏寇犯固原爲總督劉天和所敗欲自甯夏去守禮與總兵官任傑等邀敗之尋進右都御史總督軍務代天和錄前功進兵部尙書秋寇三萬騎抵綏德遊擊張鵬卻之總兵官吳英追出塞東路參將周尙文兵亦至夾擊敗之而巡按御史殷學請治罪部議延綏遊兵俱調宣大寇方避實擊虛而我能以寡勝眾宜錄其功乃加守禮太子少保謫學於外守禮尋以憂去二十九年秋舉邊才首被薦詔趣上道寇退止不行久之卒

景濤字濟之蒲州人正德庚辰進士授南京陝西道監察御史留都倉場中官久依爲市濤搜詭冒慎出納草樣米禁公私科擾儲政一清遷北臺尋按畿內首罷貴臣赴陵供需繼疏止薊山開礦免刑興利辨冤救荒悉稱旨詔築沙河宮城濤條上四事工遂停尋按江右嚴科條數十款北還衣敝不充原筭人以趙清獻比至擢順天府丞疏陳徵畿民牛車空運京粟出關不便以疾作乞歸年六十二卒濤與兄淵少相友愛嘗途遇盜兄弟爭代死竟免於難

奴昂字伯謙蒲州人正德己卯舉人醕篤馴雅三任知縣兩遷府判賢聲丕著有古循良風其令韓城時吏胥多不檢昂至約束如濕薪兩造聽訊隸人不敢索一錢廊吏終歲食數斗粟抱文案趨承而已里甲飼馬外無別供上官遺隸人至

山西通志卷一百二十九 雜錄十四  
韓日給三飯飯之外不得竊逞隸人轉相告後遂絕跡於韓  
韓人以青天呼之

楊贖字叔俊蒲州人正德己卯舉人知扶風縣秩滿擢監察  
御史疏請薛文清瑄從祀孔廟出按江北激揚清濁貪墨斂  
迹相水勢築石堤居民利之遷四川北道尋謝政歸著祀  
先睦族錄行於世後以子博貴贈兵部尚書

劉夔字舜弼襄垣人尚書龍弟正德庚午辛未聯雋選翰林  
院庶吉士改兵科給事中同考丁丑會試轉刑戶科給事中  
世廟入繼詔起太監蕭公敬疏謂非所以令天下不報京東  
民田爲權倖侵據悉斥以還民改翰林院檢討艱歸補原官  
與修武宗實錄出爲河南僉事以抗直忤旨謫判大名府葺  
元城書院進諸生商榷經史擢南京都察院經歷歷戶部郎

中出爲江西副使河南提學貴州學政所至聲績懋著轉山東按察使平反冤獄號明允晉右僉都御史巡撫保定緩賦驅蝗拯濟有法值邊警飭兵屯守要害軍政克舉三年以病乞歸又六年卒所著有黃巖集金陵稿恆陽集處州錄大名吟並奏議七卷

張鍵字君重石州人正德戊辰進士授南京戶部主事忤逆瑾逮至京師不爲屈諫衛輝府通判瑾誅復戶部主事督儲天津流寇奄至鍵登陴誓眾晝夜不怠卒保無虞薊州莊田累經奏贖不決鍵履畝清覈歸其侵於民督餉關西招商搜逋士無飢色會蘭州大饑死者枕籍鍵發票振之全活甚眾及歸蘭民遮泣立石志思尋升開封知府文移傍午揮洒如流凡事之不便於民者必釐革之未幾卒

張珩石州人正德辛未進士授監察御史巡鹽兩淮繼按畿輔及陝西所至獎廉紕貪稱名御史歷大理太僕二寺少卿僉都御史巡撫延綏尋遷南京都察院右副都御史提督操江未幾召入協理院事進左副都御史會宣大總督罷廷議屬珩珩以鄉曲辭爲言者所指落職久之以原職起巡撫甯夏進兵部右侍郎兼右僉都御史總督陝西三邊前後獲首功甚眾上數賜璽書金幣勞之進右都御史居數歲拜戶部尚書督理大倉未至值延綏有警坐失事被逮謫戍慶陽已復起爲副都御史巡撫延綏遷前職丁母憂歸卒於家年七十餘賜祭葬贈工部尚書謚襄敏珩行履修潔器識宏遠居官以剛介著前後上鹽法馬政邊略二十七疏尤博綜羣籍爲御史時會諱官缺輔臣有謂珩才行可充侍從者欲推

入翰林珩三疏不就時論高之

賈繼之汾州人參議璇子正德甲戌進士歷官戶部郎中寬厚廉謹有儀度未第時省父揚州有遺千金求通關節者不納及爲郎理錢穀一無所私以言大禮被杖卒於官

馮華石州人正德己卯舉人知鄆城縣祀鄉賢事實無可考邵相字立之澤州人正德丁卯舉人嘉靖間朝邑知縣廉謹自持政平訟理役均盜息特建忠臣高翔劉烈女祠號知大體

李翰臣大同人正德三年進士官御史巡按山東吏部主事梁穀誣歸善王當洹謀叛翰臣劾穀挾私近倖方欲邀功責翰臣爲叛人掩飾逮繫詔獄謫德州判官終山東副使

郭登庸山陰人正德甲戌進士授監察御史出按陝西劇賊



樊紳作亂督將士討之亂尋定雅善發奸嘗至一寺察其僧有異密圍以兵搜獲婦女十餘人並軍器若干立治如律改其寺爲書院再按浙江首輔張孚敬謀得永嘉沃田百頃屬之再三登庸不答至浙巡部及溫遠引疾去二年起督湖廣學政力正文體所拔士後多爲名卿遷應天府府丞改順天府府丞郊祀直園邱門爲世廟所知擢大同巡撫以鄉里辭改宣府修築邊牆餘羨金數萬悉籍以報部未幾以疾乞歸後起陝西巡撫不起生平工書法篆隸行草俱臻其妙詩亦瀟灑有致所著有自修圖

鄭本公朔州人正德九年進士歷御史武宗末請慎選宗室親賢者正位東宮繫天下望不報世宗初乾清工竣進疏以規上嘉納之踰月欲加興獻帝皇號力言不可嘉靖元年出

按遼東劾罷副總兵張銘都指揮周輔還朝論救給事中劉  
最被旨切責二年十月時享太廟極言遣代非宜報聞三年  
三月將考興獻帝且立廟禁中本公偕同官力爭奪俸三月  
及席書爲禮部尙書召張聰桂萼入京本公偕同官四十四  
人連章言已偕廷臣伏闕哭諫繫獄廷杖還職時諸御史中  
本公言最切中尋還通政參議九年不調轉大理寺丞稍遷  
南京太僕少卿歸二十年言官邢如默賈準會薦詔許召用  
不赴卒

楊永祜遼州人正德庚午舉人任山陽教諭學約森嚴勤於  
誨導中丁丑進士授刑部主事嘉靖初抗章論事復內監侵  
占民田若干頃卒於官入山陽名宦

竇明武鄉人正德辛未進士任給事中疏時政四事及京營

軍弊又疏晉地荒糧俱見嘉納後出知裕州擢鳳翔府累升  
陝西布政使俱有政聲

孫承祖平定人正德間應例入太學授深州吏目以治河有  
功升華亭縣丞嘗攝令事見賦繁弊穴振以嚴肅事咸集改  
丞宜興縣值海賊弗靖訊知巢穴盡俘其黨論功有銀牌文  
綺之賜尋改汶上縣擢知南宮縣流賊倡亂相機設伏所獲  
甚多捷聞膺錫典改知肅甯復知英山時甯藩不軌南京兵  
部檄承祖統鄉兵策應獲偽千戶申淮等十二人考績過家  
以疾卒贈廬州府通判

完承志字汝孝忻州人正德辛未進士授保定府推官有疑  
獄立爲判決擢刑部主事調吏部武帥導武宗巡行承志抗  
疏諫言甚激杖於闕下未幾升員外嘉靖改元預修武宗實

錄升郎中議大禮抗疏忤旨復被杖調考功再調文選銓除擬注各量才器請託不行擢右通政災異求言上條陳四事勢要銜之以峭執論罷年七十三卒著忻州志

孫紹祖字我山代州人檢討紹先弟也正德辛未進士選翰林庶吉士授編修嘉靖初纂修武宗實錄賜銀幣衣服特厚晉右春坊右中允充經筵講官紹祖長身偉儀觀孝友特至在席常以叔璽官扶風築城略陽遇賊力戰死略陽官吏暨不以聞與兄力爲申理得祭葬贈卹如例及洩編修兄卒於里第疏請歸葬時一子方殤妻劉以哭子垂斃略不少顧星夜馳至家撫柩慟哭旣葬奉母張如都侍養宦邸後母誕日庭下產瑞草一本生平博極羣書詩文超軼有奇氣尤工書法卒年四十二

陳阜謨代州人正德辛未進士知三河無錫二縣俱有惠政  
拜工科給事中疏劾席尙書再劾武定侯尋告歸不再出家  
徙四壁鄉評重之

吳嘉聰字惟德振武衛人正德辛未進士授豐城令土寇嘯  
聚瑞州勢甚猖獗嘉聰督兵勦平之賜金幣擢守曹州黃河  
決築防有功擢刑部員外郎會江西逆變初靖以爲南昌守  
宸濠逆狀久未上嘉聰援筆頃刻而定首推弋陽王繼藩祀  
輿情允服江隄大圯悉力規計旬日告成至今名爲吳家塘  
擢山東按察司副使兵備徐揚丁內外艱先後五載家居盡  
禮卒年六十六

閻仲字字仲夫代州人正德癸酉舉人授華陰知縣以卓異  
起部郎抗權貴謫州同升同州知州剔弊舉廢數月而治巨

盜劉漢聚眾劫掠前吏不敢問仲宇逮治將具獄盜大言曰  
吾家累千金豈爲盜者意以陰動仲宇卽撲殺之民喜形於  
謠

王濟民字士元平陸人正德丁卯舉人授樂城知縣聞母訃  
哀毀至嘔血服除補河內會世廟入嗣大統邑夫役不給濟  
民不呼而集者千餘人太監錢所過動索千金戒其家人不  
敢犯中州往多羨賦濟民悉請罷之廉明正直鄰封有不平  
輒就質號神明比奏績冢宰論廉能第一民爲立生祠祀焉  
劉湖字文淵平陸人純篤力學早負才名正德三年貢授大  
興縣丞三年績最進階文林郎升濟南府通判雪冤獄禱雨  
澤卻常例服豪強綽有惠政百姓立石頌德致仕歸絕迹公  
門不談時事講究經史訓誨後學士論推重

山陰通志卷一百二十一 人物 一四  
胡諧安邑人正德庚午舉人初授慶都知縣歷平涼温州同知終雲南參議剛毅有爲一塵不染蒞官所至有聲在慶都民皆以胡青天稱之倅温州風采大振政績益隆致仕家居曾遇盜於途從者奔散盜窺之曰胡公也爲之御至里門叩謝而去巡鹽王諍溫人也極重之檄祀鄉賢祠

劉紳字文翔平陸人濟南通判潮從弟也幼敏慧力學有大志以名節自砥礪正德辛未登進士第初官行人擢四川道監察御史發宸濠逆謀糾李隆奸狀時稱眞御史按甘涼再按畿輔清理山東戎政武宗北巡抗疏請回鑾嘉靖初大禮議起力與張桂爭尋復條時所宜行者十二款蒙嘉納後引疾歸力田課子冲然自得當時名人如彭澤邊貢呂柟康海輩皆亟爲推重卒時年七十七門人私謚曰忠毅先生

程鵬解州人正德辛未進士知鄠縣清正自守剛介無私長  
安尙書劉璣繪十頌圖美之悉知鄧州內擢刑部郎中卒於  
京冢宰王瓊見其囊橐蕭然嘆曰於此知其守矣爲具棺斂  
之

相世芳安邑人正德甲戌進士歷官刑部郎中沈毅質直不  
苟言笑博極羣書詩文雄邁嘉靖甲申廷議大禮眾論移日  
未定世芳抗疏直諫略無避諱值帝震怒或傳爲首者棄市  
眾驚惶無措世芳不動色以身當之旋廷杖幾斃謫戍延安  
慨然行伍凡十三年詔還終身無怨言隆慶初追贈太常寺  
少卿子邦教舉人

邱東魯解州人正德丙子舉人授廣平府同知廉明有幹郡  
有疑獄十年不決東魯甫下車一言成信讞時小民訛傳兵



來驚竄四散東魯屹然不動從容曉諭民始安堵焉歷戶部郎中以養親告歸所著有見聞錄

張致夏縣人正德丙子舉人體貌魁梧自少讀書便以節槩自高授永清知縣愛民下士瘴惡不撓有殺一家三人者先時屢以賄免致實之法又優人臧賢與致同里獲幸武廟勢凌宰輔致終不許一見其剛介如此

謝誥安邑人正德丁丑進士性狷介絕俗爲孝廉時齊彥名謀寇運城誥慷慨建議爲守城策監臨立鳩夫增築運城至今賴焉爲贛榆知縣值武宗南巡節省供張民不爲厲比歸杜門謝客蕭然如韋布

范昕字晦之絳州人正德癸酉舉人初官趙州知州值世廟幸承大駕過次日行宮災大吏將移罪散僚昕不聽慨然自

認及同知承天御史以陵監家人橫肆不法屬所鞠訊所論  
報如律陵監銜之誣奏御史及听下獄成南海所言動意氣  
如常時不少變後遇赦歸萬厯中晉階四品

陶滋字時雨絳州人尙書掾子正德甲戌進士初官行人值  
武廟南巡抗疏力諫伏輦下不起詔廷笞之幾斃謫國子監  
學正擢刑部郎中改兵部武選大禮議起以去本生二字伏  
蒲哭諫聲徹大內傳旨廷杖繫獄三年後仍謫戍世廟上賓  
有詔錄用已前二十年歿矣滋學問淵博爲學正時以石鼓  
文殘缺上下千古考覈精詳刊石鼓正誤一書隆慶初贈太  
常寺少卿

李淮字巨川聞喜人正德甲戌進士性孝友居鄉以行誼著  
初官刑部主事督太倉及密雲儲公廉明允屬吏皆知畏愛

中官怙勢者亦感動有加禮已復督糧江南理餉遼東擢四  
川參議分守河西督邊餉有詔使奉命勘番人入寇情形受  
執政指將有所中傷准極論夷情反覆國體宜正不可重爲  
欺罔詔使不能奪擢副使備兵岷洮總制王以諳練邊情奏  
留整理河西加參政歲饑奉委散賑窮鄉僻壤必身親歷雖  
嬰疾不違寢食至永壽嘔血數升未幾特命巡撫延綏疾益  
甚未蒞任卒准潛心理學所著有詩經辨疑及小憲清適諸  
集

韓瓚絳州人正德己卯舉人歷教諭升藍田知縣政尙廉平  
百姓爲立生祠升漢中通判會妖人劉列謀爲不軌瓚監軍  
督率有方斬首五十餘級生擒百餘人獲僞詔及妖書欵券  
金幣起補保定升濟甯知州節愛有聲補通州兩院才之京

兆憎其傲調甯州致仕

郭孜垣曲人以監生授四川威遠知縣勸農浚渠廣儲救荒修學造士百姓有青天之歌以考績卒於京威遠士民在京者咸製服舉哀後部民立祠追祀焉

趙載字文載垣曲人正德辛未進士初官戶部主事歷員外郎中奉命督漕運抗疏言漕政利病擢陝西參議分守商洛道削平叛寇賜白金文綺會土魯番侵哈密爲邊郡害總督楊一清以副使薦備兵甘涼廷議掩擊爲便載請仿趙充國故事乃興屯練兵開鹽召商士馬飽騰所向克捷番人牙木蘭帖木哥等各率其眾來降遷參政仍備兵其地擢僉都御史巡撫甘肅數年政教修明威聲遠播異域相率嚮伏晉南京右副都御史提督操江頒行條列邊務十二事爲忌者所

中事白尋卒遣官諭祭治其墓蔭子入監所著有都府奏議及忠貞錄忠節祠集諸書

裴繼芳靈石人知州泰子也正德辛未進士授工部都水司主事管開臨清時宦豎勢燄恣橫至臨清凌轍官吏益甚繼芳乃盤驗其私船搜獲貨物入之官漕河肅清官民免害復除戶部管糧通州門無私謁運官夙弊一時剗革殆盡聲聞朝野以疾乞休歸林下十餘年怡情於詩酒山水間卒之日囊無餘貲舊廬僅蔽風雨而已

以上正德年

右明成化至正德一百三十三人

孟陽字子乾澤州人吏部侍郎春之子也正德九年進士爲行人久不遷或諷之見當路不可武宗將南巡語諸僚曰此舉繫社稷安危一命之士皆與有憂豈必言官乃當効死遂

與同官李紹賢詹軾劉概李惠上疏切諫廷杖四十卒春聞  
子死諫哭之以詩語甚悲壯人爭傳之補遺下同

申良字延賢高平人登鄉薦授招遠知縣山東盜起豫爲戰  
守具追擊盜至黃縣俘斬數百人己復破走之歷知諸城良  
鄉權貴往來要索悉拒之進安吉知州錦衣葉瓊倚錢甯勢  
奪民田良讞還之民瓊嫉奸人誣奏事得白稍遷常州同知  
招遠民懷其政圖像祠之入爲戶部員外郎以諫大禮杖死  
贈太僕少卿

